

UDHËZIM NR. 1 DATË 21.11.2024

PËR ZHVILLIMIN E ZGJEDHJEVE NË URDHRIIN E MJEKËVE TË VITIT 2025

Në zbatim të Ligjit Nr 123/2014 “Për Urdhrit e Mjekëve në Republikën e Shqipërisë”, i ndryshuar, Statuti i Urdhrit të Mjekëve të Shqipërisë, i miratur me vendimin e Këshillit Kombëtar të Urdhrit të Mjekëve të Shqipërisë me Nr. 1, datë 19.06.2015, i ndryshuar, miratojmë këtë akt udhëzimi për Këshillat Rajonale të Urdhrit të Mjekëve dhe strukturat përkatëse të Aparatit Qëndror Ekzekutiv pranë Këshillit Kombëtar të Urdhrit të Mjekëve të Shqipërisë si më poshtë:

Neni 1.

Ngritja e Komisionit të Vlerësimit të Kandidaturave (KVK).

Për organizimin sa më korrekt dhe të paanshëm të zgjedhjeve, si dhe për përmbushjen e kriterëve të përcaktuara qartë si në Ligjin Nr. 123/2014 “Për Urdhrit e Mjekëve në Republikën e Shqipërisë”, i ndryshuar, ashtu edhe në statutin e tij, nevojitet ngritja e Komisionit të Vlerësimit të Kandidaturave.

Ky komision përbëhet nga 3 (tre) anëtarë dhe miratohet nga Këshilli Kombëtar i UMSH-së.

Ky komision në zbatim të ligjit, statutit dhe të këtij udhëzimi do të bëjë vlerësimin e kandidaturave të paraqitura, për anëtarë të këshillave rajonale, Presidentë të këshillave rajonale, anëtarë të Këshillit Kombëtar dhe të Presidentit të Këshillit Kombëtar të Urdhrit të Mjekëve të Shqipërisë.

Lista e kandidatëve të paraqitur konform këtij udhëzimi, do të shpallet nga data 25.11.2024 deri më date 20.12.2024.

Komunikimi për paraqitjen e kandidaturave do të bëhet publike në faqen zyrtare të Urdhrit të Mjekëve të Shqipërisë.

Neni 2

Ngritja e Komisionit të Administrimit të Zgjedhjeve (KAZ).

Për organizimin dhe administrimin e zgjedhjeve nevojitet ngritja e Komisionit të Administrimit të Zgjedhjeve, që do të përbëhet nga 3 anëtarë, përbërja e të cilëve ngrihet me Urdhër të Presidentit të Këshillit Kombëtar.

Ky komision do të merret me organizimin dhe administrimin e zgjedhjeve të Urdhrit të Mjekëve të Shqipërisë së vitit 2025, anëtarët e këshillave rajonale, Presidentët e Këshillave Rajonale, të anëtarëve të Këshillit Kombëtar të Urdhrit të Mjekëve të Shqipërisë si dhe të Presidentit të K.K.U.M.SH-së.

Anëtari i 3 i këtij Komisioni do të jetë Sekretari Rajonal përkatës në detyrë dhe për zgjedhjet e Këshillit Kombëtar, Presidentit dhe Zëvendësit të tij do të jetë Sekretari i Përgjithshëm.

Komisioni Administrimit të Zgjedhjeve ka për detyrë:

- regjistrimin e kandidaturave të konfirmuara nga KVK, dhe përgatitjen e materialeve zgjedhore me kandidaturat;
- nxjerrjen e listës së mjekëve votues sipas rajoneve;
- hartimin dhe prodhimin e regjistrave dhe materialeve zgjedhore;
- administrimin e zgjedhjeve pranë këshillave rajonale, si për asambljetë rajonale ashtu dhe për zgjedhjet e anëtarëve të këshillave rajonale dhe të presidentëve të tyre.
- mbajtjen e procesverbalit gjatë zgjedhjeve;
- numërimin e fletëve të votimit;
- shpalljen e rezultatit përfundimtar të votimit.

Neni 3

Paraqitja e kandidaturave për në këshillat rajonale.

Çdo mjek, anëtar i rajonit mund të paraqesë kandidaturën, brenda afateve të përcaktuara për në anëtarësinë e këshillit të rajonal përkatës, duke e paraqitur kërkesën me shkrim dhe duke e protokolluar atë pranë Urdhrit të Mjekëve të Shqipërisë.

Njoftimi për paraqitjen e kandidaturave bëhet nëpërmjet faqes zyrtare të Urdhrit të Mjekëve të Shqipërisë.

Kriteret për kandidatë, anëtarë të këshillave rajonale janë:

- a.** të jetë shtetas shqiptar;
- b.** të jenë anëtarë të regjistruar pranë Urdhrit për një periudhë kohore 10 vjeçare, pandërprerje;
- c.** të ketë reputacion etiko-moral dhe profesional;
- ç.** të ketë përvojë dhe të dhëna të besueshme për aftësi komunikuese, të ketë shfaqur korrektësi në zbatimin e normave dhe rregullave në jetën shoqërore, në komunikimin me publikun, pacientët, kolegët, si dhe me drejtuesit;
- d.** të mos jetë ndëshkuar me vendim të formës së prerë për kryerjen e një krimi apo kundravajtje penale, si dhe gjatë 5 (pesë) viteve të fundit të mos ketë marrë masa ndëshkimore disiplinore.
- dh.** të mos ketë funksione drejtuese në administratën shtetërore dhe të mos bëjë pjesë në forume drejtuese partiake të çdo niveli qofshin, nga të cilat detyrimisht duhet të jetë dorëhequr në momentin e kandidimit.
- e.** të ketë kontribute dhe të ketë qenë i aktivizuar në strukturat dhe veprimtaritë e Urdhrit;

Për kandidatët që pretendojnë për postin e Presidentit të këshillit rajonal kriter është mos mbajtja e funksioneve të ndryshme (administrative dhe/ose politike).

Në zbatim të ndryshimeve të fundit të statutit të Urdhrit të Mjekëve të Shqipërisë përfaqësimi i anëtarëve për në këshillat rajonale është:

Këshilli Rajonal i Urdhrit të Mjekëve	Totali Anëtarëve	Nr.	Qyteti	Nr.	Qyteti	Nr.	Qyteti	Nr.	Qyteti
Berat	5(pesë)	2(dy)	Berati	1(një)	Kuçova	1(një)	Ura Vajgurore	1(një)	Skrapari dhe Peqini
Dibër	5(pesë)	3(tre)	Dibra	1(një)	Burreli	1(një)	Bulqiza		
Durrës	5(pesë)	4(katër)	Durrësi	1(një)	Kruja				
Elbasan	5(pesë)	3 (tre)	Elbasani			1(një)	Librazhdi	1(një)	Gramsh
Fieri	5(pesë)	3(tre)	Fieri	1(një)	Ballshi	1(një)	Lushnja		
Gjirokastrë	5(pesë)	3(tre)	Gjirokastra	1(një)	Përmeti		Tepelena	1(një)	Saranda
Korçë	5(pesë)	2(dy)	Korça	1(një)	Erseka	1(një)	Pogradeci	1(një)	Bilishti
Kukës	5(pesë)	3(tre)	Kukësi	1(një)	Tropoja	1(një)	Hasi		
Lezhë	5(pesë)	3(tre)	Lezha	1(një)	Kurbini	1(një)	Rrëshen		
Shkodër	5(pesë)	3(tre)	Shkodra	1(një)	Puka	1(një)	Malësia Madhe		
Tiranë	7(shtatë)	6(gjashtë)	Tirana	1(një)	Kavaja				
Vlorë	5(pesë)	5(pesë)	Vlora						

Kandidati, brenda afatit të përcaktuar në nenin 1 të këtij udhëzimi, duhet të paraqesë së bashku me kërkesën për aplikim për kandidaturë këto dokumente:

- Kërkesën ku shprehet qartë lidhur me kandidimin për anëtar të Këshillit Rajonal,
- Kërkesën ku shprehet qartë lidhur me kandidimin për President të Këshillit Rajonal,
- Dokument identifikimi të vlefshëm;
- Kopje të lejes së ushtrimit individual të profesionit të vlefshme;
- Kartën e anëtarësisë;
- Vërtetim nga institucioni ku punon lidhur me pozicionin dhe me ekzistencën e masave administrative të marra ndaj tij.

- Curriculum Vitae.

Pavarësisht nëse kandidati ka paraqitur kërkesë dhe është vlerësuar e vlefshme kandidatura e tij nga KVK, për të kandiduar për pozicionin e Presidentit të Këshillit Rajonal përkatës, ai nuk mund të kandidojë nëse ai/ajo paraprakisht nuk zgjidhet si anëtar i këtij këshilli rajonal.

Çdo Këshill Rajonal i UMSH-së duhet të ketë listat zyrtare të mjekëve që ushtrojnë profesionin në rajonin e tyre dhe këto lista do të përdoren për të verifikuar të gjithë mjekët që do të votojnë në ditën e zgjedhjeve.

Të gjithë mjekët që kanë të drejtë vote duhet të paraqesin pranë Komisionit të Administrimit të Zgjedhjeve në ditën e votimit:

Kopje license (në formë elektronike ose fotokopje).

Në rast se një mjek rezulton i regjistruar, anëtarësuar dhe i licënsuar pranë një Këshilli Rajonal dhe ushtron profesionin në një Këshill tjetër Rajonal, ka të drejtë të votojë vetëm në atë rajon ku ai e ushtron profesionin.

Në rast se një mjek paraqitet me një licencë të pa rinovuar nuk ka të drejtë të votojë.

Neni 4

Asambleja Kombëtare e Urdhrit të Mjekëve të Shqipërisë.

Asambleja Kombëtare e Urdhrit të Mjekëve të Shqipërisë, përbëhet nga përfaqësimi i anëtarësisë në tërë territorin e Republikës së Shqipërisë, prandaj anëtarët e rinj të zgjedhur nga Këshillat Rajonale përkatëse, janë anëtarë të Asamblesë Kombëtare.

Presidenti dhe Zv. Presidenti i Këshillit Kombëtar të Urdhrit të Mjekëve të Shqipërisë, ekzistues, janë anëtarë të Asamblesë Kombëtare.

Neni 5

Paraqitja e kandidaturave për anëtarë të këshillit kombëtar dhe të presidentit.

Në zbatim të pikës 2 nenit 17 – Këshilli Kombëtar, në statutin e Urdhrit të Mjekëve të Shqipërisë sqarohet se presidentët e Këshillave Rajonale të sapo zgjedhur, me qëllim përfaqësimi të të gjitha rajoneve në këtë këshill, votohen në grup nga asambleja kombëtare.

Në zbatim të nenit 13, ligji Nr. 123/2014 “Për urdhrin e mjekëve të Shqipërisë” Presidenti dhe Zv. Presidenti i Këshillit Kombëtar, në rast rikandidimi për në këshillin kombëtar janë anëtarë.

Pas përfundimit të procedurave të mësipërme asamblea kombëtare procedon me zgjedhjen e kandidatëve të ngelur për anëtarë të Këshillit Kombëtar, të cilët zgjidhen me shumicën e thjeshtë të votave.

Konform statutit, asamblea kombëtare votimin e kandidatëve e bën të hapur, me përjashtim të rasteve, kur vetë asamblea vendos ndryshe.

Kriteret për kandidatë, anëtarë të këshillit kombëtar janë:

- a. të jetë shtetas shqiptar;
- b. të jenë anëtarë të regjistruar pranë Urdhrit për një periudhë kohore 10 vjeçare, pandërprerje;
- c. të ketë reputacion etiko-moral dhe profesional;
- ç. të ketë përvojë dhe të dhëna të besueshme për aftësi komunikuese, dhe të ketë shfaqur korrektësi në zbatimin e normave dhe rregullave në jetën shoqërore, në komunikimin me publikun, pacientët, kolegët, si dhe me drejtuesit;
- d. të mos jetë ndëshkuar me vendim të formës së prerë për kryerjen e një krimi apo kundravajtje penale, si dhe gjatë 5 (pesë) viteve të fundit të mos ketë marrë masa ndëshkimore disiplinore.
- dh. të mos ketë funksione drejtuese në administratën shtetërore dhe të mos bëjë pjesë në forume drejtuese partiake të çdo niveli qofshin, nga të cilat detyrimisht duhet të jetë dorëhequr në momentin e kandidimit.
- e. të ketë kontribute dhe të ketë qenë i aktivizuar në strukturat dhe veprimtaritë e Urdhrit;

Kandidatët për president të Këshillit Kombëtar të Urdhrit të Mjekëve të Shqipërisë, janë kandidatë anëtarët e përzgjedhur të Këshillit Kombëtar, të zgjedhur nga asamblea. përjashto rastin e rikandidimit të Presidentit ekzistues.

Kriteret për kandidatë, President i Këshillit Kombëtar dhe Presidentë të Këshillave Rajonale janë kriteret e përcaktuara në pikën 4 dhe 5 të nenin 15, i ligjit Nr. 123/2014 “Për urdhrin e mjekëve në Republikën e Shqipërisë”:

- të jenë jo më shumë se në moshën e daljes në pension në momentin e zgjedhjes;
- të kenë jo më pak se 15 vjet eksperiencë në profesion;
- të kenë përvojë dhe të dhëna të besueshme për aftësi komunikimi, organizimi e drejtimi;
- të mos jenë marrë ndaj tyre masa ndëshkimore disiplinore në 5 vitet e fundit;
- të kenë prestigj dhe reputacion etiko-moral dhe profesional;
- të kenë kryer botime shkencore;
- të mos jenë të dënuar me vendim të formës së prerë për kryerjen e një krimi apo për kryerjen e një kundërvajtjeje penale me dashje.

- funksioni i presidentëve të Urdhrit të Mjekëve është i papajtueshëm me çdo funksion tjetër administrativ, shtetëror apo politik

Personat që synojnë të kandidojnë për anëtarë të Këshillit Kombëtar të Urdhrit të Mjekëve të Shqipërisë apo për President të Këshillit Kombëtar të Urdhrit të Mjekëve të Shqipërisë, paraqesin kërkesën ku shprehen qartë lidhur me kandidimin e tyre për këto poste drejtuese.

Kërkesa për kandidim në Anëtarësinë e Këshillit Kombëtar të Urdhrit të Mjekëve të Shqipërisë, si dhe për postin e Presidentit të këtij Këshilli, duhet të paraqitet, brenda afatit të përcaktuar në nenin 1 të këtij udhëzimi, nga data 25.11.2024 deri më datën 20.12.2024.

Pavarësisht nëse kandidati ka paraqitur kërkesë për të kandiduar për në anëtarësinë e Këshillit Kombëtar, si dhe të pozicionit të Presidentit të këtij këshilli, ai nuk mund të kandidojë në këto poste nëse paraprakisht nuk zgjidhen si anëtar i një Këshilli Rajonal, dhe në vijim si anëtar i Këshillit Kombëtar.

Votimi për zgjedhjen e Presidentit do të bëhet në mbledhjen e parë të Këshillit Kombëtar të Urdhrit të Mjekëve të Shqipërisë dhe do të jetë votim i mbyllur.

Votimi për zgjedhjen e presidentit bëhet mbështetur në kandidaturat e ngelura nga përzgjedhja.

Neni 6

Përcaktimi i afateve dhe datave.

Me qëllim të respektimit të përfundimit të afateve lidhur me mandatet e anëtarëve të Këshillave Rajonale të Urdhrit të Mjekëve, Presidentëve të Këshillave Rajonale, Këshillit Kombëtar të Urdhrit të Mjekëve të Shqipërisë dhe të Presidentit të këtij të fundit, përcaktohen datat e mëposhtme me qëllim, marrjen e masave për zhvillimin e zgjedhjeve të vitit 2025 të Urdhrit të Mjekëve të Shqipërisë.

- Nga data 25.11.2024 deri datën 20.12.2024, afati i paraqitjes së kandidaturave për:

a. Anëtarë të Këshillave Rajonale;

b. President të Këshillit Rajonal;

c. Anëtarë të Këshillit Kombëtar;

d. President të Këshillit Kombëtar.

- Data _____, 2025, zhvillimi i zgjedhjeve në K.R.U.M. Berat,

- Data _____, 2025, zhvillimi i zgjedhjeve në K.R.U.M. Dibër,

- Data _____, 2025, zhvillimi i zgjedhjeve në K.R.U.M. Durrës,

- Data _____, 2025, zhvillimi i zgjedhjeve në K.R.U.M. Elbasan,

- Data _____.2025, zhvillimi i zgjedhjeve në K.R.U.M. Fier,
- Data _____.2025, zhvillimi i zgjedhjeve në K.R.U.M. Gjirokastrë,
- Data _____.2025, zhvillimi i zgjedhjeve në K.R.U.M. Korçë,
- Data _____.2025, zhvillimi i zgjedhjeve në K.R.U.M. Kukës,
- Data _____.2025, zhvillimi i zgjedhjeve në K.R.U.M. Lezhë,
- Data _____.2025, zhvillimi i zgjedhjeve në K.R.U.M. Shkodër,
- Data _____.2025, zhvillimi i zgjedhjeve në K.R.U.M. Tiranë,
- Data _____.2025, zhvillimi i zgjedhjeve në K.R.U.M. Vlorë,

Pas përfundimit të të gjitha zgjedhjeve në të 12 Këshillat Rajonale të UMSH-së, si dhe pas ankimimeve, nëse do ketë, Presidenti në detyrë i Këshillit Kombëtar do të vendosë datën për zhvillimin e asamblesë kombëtare të Urdhrit të Mjekëve të Shqipërisë dhe zgjedhjen e anëtarëve të Këshillit Kombëtar, si dhe do të zhvillohet mbledhja e parë e Këshillit Kombëtar të Urdhrit të Mjekëve të Shqipërisë dhe zgjedhja e Presidentit të tij.

ZHVILLIMI I ZGJEDHJEVE PRANË KËSHILLAVE RAJONALE

Neni 7

Fletët e votimit për në Këshillat Rajonale.

Aparati Qëndror Ekzekutiv pranë Këshillit Kombëtar merr të gjitha masat paraprake lidhur me zhvillimin e zgjedhjeve pranë Këshillave Rajonale duke përgatitur Fletët e votimit, listën e zgjedhësve dhe çdo material tjetër të nevojshëm për zgjedhjet për secilin rajon.

Fletët e Votimit të çdo rajoni, do i dorëzohen Komisionit të Administrimit të Zgjedhjeve, nëpërmjet një proces verbali dhe pas përfundimit të zgjedhjeve dorëzohen pranë Aparatit Qëndror Ekzekutiv të Këshillit Kombëtar nëpërmjet procesverbalit, së bashku me materialet e tjera.

Fletët e votimit do të jenë dy:

1. me shënimi në krye të fletës **“KANDIDATË PËR ANËTARË TË KËSHILLIT RAJONAL”**
2. me shënimi në krye të fletës **“KANDIDATË PËR PRESIDENT TË KËSHILLIT RAJONAL”**

Fletët e votimit nuk duhet të kenë asnjë shënim në të dhe do të vulojnë nga Komisioni i Administrimit vetëm kur i dorëzohet votuesit, pas regjistrimit të tij në regjistër.

Fleta e votimit duhet të përmbajë emrat e kandidatëve të paraqitur për t'u zgjedhur si anëtarë të Këshillit Rajonal.

Për pasojë fleta e votimit do të jetë format A4. Për disa rajone referuar edhe numrit të kandidaturave të paraqitura “Fleta e votimit” mund të ketë edhe më shumë fletë.

Vendosja e emrave të kandidatëve në fletën e votimit do të bëhet sipas shkronjave të alfabetit nga A-ja tek ZH-ja.

Neni 8

Zhvillimi i zgjedhjeve për Këshillat Rajonale.

Ditën e përcaktuar në këtë udhëzim, përjashtuar rastet e jashtëzakonshme, duhet të zhvillohen zgjedhjet në rajonin përkatës, lidhur me përfaqësuesit e këshillit rajonal përkatës, në përpjestim me numrin e anëtarëve, siç parashikohet në nenin 3 të këtij udhëzimi.

Këshilli Rajonal ekzistues duhet të marrë të gjitha masat për gjetjen e ambienteve për zhvillimin e zgjedhjeve dhe në bashkëpunim me Aparatin Qendror Ekzekutiv të Këshillit Kombëtar të marrë masa për mirë organizimin dhe mirëfunksionimin e zgjedhjeve në rajon.

Këshilli Rajonal në bashkëpunim me Komisionin e Administrimit të Zgjedhjeve paraprakisht datës së zgjedhjeve, të përcaktuara në nenin 6 të këtij udhëzimi, duhet të zhvillojë zgjedhjet për anëtarin që përfaqëson anëtarësinë e këshillave në qytetet me anëtarësi të vogël që janë varësi e tyre (sipas tabelës në nenin 3).

Zhvillimi i zgjedhjeve në qytetet me anëtarësi të vogël do të zhvillohen nga Këshillat Rajonale përkatëse me ndihmën e Aparatit Qendror Ekzekutiv pranë Këshillit Kombëtar, duke qënë vetëm Sekretari dhe Presidenti i Këshillit Rajonal ekzistues që do të zëvendësojë rolin e K.A.Z. në to.

Ditën e caktuar, në ambjentin e përcaktuar për zhvillimin e zgjedhjeve në rajon duhet të paraqitet Komisioni i Administrimit të Zgjedhjeve, i cili i merr të gjitha masat, për fillimin e procesit të votimit nga ora 08.00 deri në orën 14.00. Përjashtim bën K.R.U.M. Tiranës, që lidhur me numrin e lartë të anëtarësisë do të ketë një orar nga ora 08.00 deri në orën 17.00.

Këshilli Rajonal, si dhe Aparati Qendror Ekzekutiv pranë Këshillit Kombëtar do të marrë të gjitha masat për njoftimin e anëtarësisë për datën dhe orarin e zhvillimit të zgjedhjeve sipas rajoneve.

Komisioni i Administrimit të Zgjedhjeve duhet të ketë materialet zgjedhore që janë:

- Lista rajonale e votuesve;
- Fletët e votimit;
- Kutinë e votimit;
- Regjistri i regjistrimit të votuesve të paraqitur;
- Librin e Procesverbalit;
- Vulën për vulosjen e proces verbalit dhe të fletëve të votimit.

Komisioni i Administrimit të Zgjedhjeve në orën 08.00 hap votimin dhe mban procesverbal lidhur me hapjen e votimit.

Komisioni i Administrimit të Zgjedhjeve, me fillimin e procesit të votimit, njëri nga anëtarët e tij realizon verifikimin e emrit të votuesit në listën përkatëse rajonale, ndërsa anëtari tjetër realizon regjistrimin e votuesit në Regjistrin e regjistrimit të votuesve të paraqitur duke bërë identifikimin e anëtarit nëpërmjet liçensës dhe vërtetimit të punës ku e ushtron profesionin.

Kryetari i Komisioni i Administrimit të Zgjedhjeve pasi vulos Fletën e votimin e pajis votuesin me të dhe e orienton drejt kutisë së votimit.

Për anëtarët rajonal që nuk rezultojnë në listën përkatëse rajonale, pas verifikimit të mundshëm mund të bëhet shtimi me shkrim dore të emrit të tyre në pjesën fundore të listës dhe në fund të shënohet ky fakt në procesverbal.

Në orën 14.00 mbyllet procesi i votimit, votuesit e pranishëm të paraqitur para orarit të mbylljes regjistrohen në regjistër dhe lejohet të votojnë. Për rajonin e Tiranës orari i mbylljes do të jetë ora 17.00.

Komisioni i Administrimit të Zgjedhjeve mbyll votimin duke e shënuar në procesverbalin përkatës orarin e përfundimit të votuesit të fundit.

Pasi mbyllet procesi i votimit, Komisioni i Administrimit të Zgjedhjeve nis procesin e numërimit të votave, për anëtarët e këshillave rajonale përkatëse duke bërë shënimet përkatëse në proces verbal, për çdo problematikë të hasur.

Në fund, Komisioni i Administrimit të Zgjedhjeve nxjerr rezultatit lidhur me zgjedhjen e anëtarëve të këshillave rajonale përkatëse, që e shënon në procesverbalin për nxjerrjen e rezultatit ku shënohet numri i votuesve të paraqitur, numri i fletëve të votimit të vlefshme, numri i fletëve të votimit të pavlefshme dhe rezultati përfundimtar sipas numrit të votuesve.

Kopje e këtij proces verbali i dorëzohet Këshillit Rajonal përkatës, i cili merr masat për komunikimin e rezultatit dhe të njoftimit e anëtarëve të këshillave rajonale përkatëse lidhur me votimin për zgjedhjen e Presidentëve të Këshillave Rajonal përkatës.

Në rast kontestimesh, nga ndonjë kandidat, paraqitet kërkesë për verifikim pranë Aparatit Qendror Ekzekutiv të Këshillit Kombëtar të Urdhrit të Mjekëve të Shqipërisë, i cili për efekt transparence, brenda një afati të mundshëm, bën të mundur bëhet verifikimi e fletëve të votimit të rajonit përkatës.

Në raste se nga verifikimi, i kryer pranë Aparatit Qendror Ekzekutiv të Këshillit Kombëtar të Urdhrit të Mjekëve të Shqipërisë, vërehen ndryshime që ndikojnë në listën e shpalljes së rezultateve atëherë, ky aparat nxjerr listën përfundimtare të korrigjuar.

Në ambjentet ku zhvillohen zgjedhjet për anëtarë të Këshillit Rajonal, do të jenë prezent përveç KAZ, Presidenti i Këshillit Rajonal dhe përfaqësues të Aparatit Qëndror Ekzekutiv

Neni 9

Mënyra e votimit pranë Këshillave Rajonale.

Në fletën e votimit përkatëse, përkrah emrit të çdo kandidati do të jetë një kuti (□), ku votuesi duhet të shënojë në të me shenjën “x” ose “+”. Çdo shënim tjetër nuk do të merret parasysh dhe fleta e votimit do të quhet e pavlefshme.

Duke ju përmbajtur numrit të përcaktuar në nenin 15 pika “b” e Statutit të Urdhrit të Mjekëve të Shqipërisë, si dhe nga pika 3 e këtij udhëzimi, nga kandidaturat e paraqitura votuesi do të votojë vetëm për numrin e anëtarëve të Këshillit Rajonal.

Çdo votues që voton mbi numrin e lejuar të anëtarëve, e bën të pavlefshme fletën e votimit.

Komisioni i Administrimit të Zgjedhjeve ka për detyrë t'i komunikojë edhe një herë votuesve numrin e kandidatëve që mund të zgjedhë votuesi, në momentin e dorëzimit të fletës së votimit.

Votuesi pasi realizon shënimin me “x” ose “+” të kandidatëve që ai përzgjedh duhet të palosë fletën e votimit 2 herë dhe ta fusë në kutinë e votimit përkatëse.

Nuk lejohet asnjë shënim në fletën e votimit, për pasojë çdo fletë votimi që do të konstatohet me shënime do të konsiderohet e pavlefshme dhe nuk do të numërohet. Numri i fletëve të pavlefshme do të shënohen në procesverbalin përkatës për nxjerrjen e rezultatit.

Neni 10

Mënyra e numërimit të votave dhe shpallja e rezultatit.

Pas përfundimit të procesit të votimit dhe shënimit në proces verbal të mbylljes së tij, kryetari i Komisioni i Administrimit të Zgjedhjeve, pasi largon personat e paautorizuar nga ambienti fillon hapjen e kutisë.

Fletët e votimit nxirren një e nga një dhe pasi verifikohet nga të gjithë anëtarët e Komisioni i Administrimit të Zgjedhjeve lidhur me vlefshmërinë e fletës së votimit, fillon numërimi i kandidaturave të zgjedhura.

Sekretari i rajonit përkatës, me cilësinë e anëtarit të Komisioni i Administrimit të Zgjedhjeve pasi verifikon fletën e votimit bën shënimin lidhur me numërimin në procesverbalin e nxjerrjes së rezultatit përfundimtar.

Çdo kandidat i përzgjedhur nga votuesi, në procesverbalin e numërimit, i vendoset një shënjë “x”.

Në fund të numërimit të fletëve të votimit, të 3 anëtarët e Komisioni i Administrimit të Zgjedhjeve bëjnë secili numërimin e shenjave “x”, duke nxjerrë rezultatin për çdo kandidaturë.

Përzgjidhen si kandidatë fitues, kandidatët që kanë numrim më të lartë të votave.

Në rast se në kandidatët fitues ka kandidat me vota të barabarta, ku njëri prej tyre duhet nuk mund të jetë anëtar si pasojë e plotësimit të numrit, fituesi përzgjidhet nëpërmjet shortit.

Pas shënimit në proces verbalin e numërimit të numrit përfundimtar të votave për secilin kandidat dhe nxjerrjen e kandidaturave fituese, mbahet proces verbali i nxjerrjes së rrezultatit përfundimtar, i cili pasi lexohet nga anëtarët e Komisioni i Administrimit të Zgjedhjeve firmoset nga secili nga ato.

Në rast se ndonjë anëtar ka kundërshtim apo kontestim lidhur me ndonjë procedurë apo veprim të këtij komisioni, ai bën shënim në proces verbalin e nxjerrjes së rezultatit përfundimtar duke pasqyruar në të pretendimin e tij.

Në rast të mos nënshkrimit të anëtarit të Komisioni i Administrimit të Zgjedhjeve në proces verbalin e nxjerrjes së rezultatit përfundimtar, dy anëtarët e tjerë shënojnë në të *“refuzon nënshkrimin”*

Atëherë kur kandidatët janë për short, procedura e hedhjes së shortit është nëpërmjet hedhjes së një monedhe nga ana e kryetarit të Komisioni i Administrimit të Zgjedhjeve.

Për hedhjen e shortit thirren të jenë të pranishëm, nëse është e mundur kandidatët përkatës, në pamundësi presidenti ekzistues i Këshillit Rajonal përkatës, me cilësinë e dëshmitarit.

Numërim i fletëve të votimit për anëtarë të Këshillit Rajonal bëhet vetëm në praninë e Komisioni i Administrimit të Zgjedhjeve.

Numërimi i fletëve të votimit për anëtarë të këshillave rajonale mund të jenë të pranishëm vetëm kandidatët pretendentë, të cilët në asnjë rast nuk duhet të ndërhyjnë gjatë procesit. Për çdo konstestim apo vërejtje lidhur me procesin e votimit apo numërimit, që ato mund të kenë duhet t’i drejtohen me shkrim Aparatit Qendror Ekzekutiv pranë Këshillit Kombëtar. Në rast të mos paraqitjes së konstestimit anëtarët e pranishëm duhet të nënshkruajnë marrjen dijeni të rezultatit dhe pranimin e tij.

Numërimi i fletëve të votimit për anëtarë të këshillit kombëtar mund të jenë të pranishëm vetëm kandidatët pretendentë, të cilët në asnjë rast nuk duhet të ndërhyjnë gjatë procesit. Për çdo kontestim apo vërejtje lidhur me procesin e votimit apo numërimit, që ato mund të kenë duhet t’i drejtohen me shkrim Aparatit Qendror pranë Këshillit Kombëtar. Në rast të mos paraqitjes së konstestimit anëtarët e pranishëm duhet të nënshkruajnë marrjen në dijeni të rezultatit dhe pranimin e tij.

Numërimi i fletëve të votimit për Presidentin të Këshillit Rajonal të Urdhrit të Mjekëve të Shqipërisë mund të jenë të pranishëm vetëm kandidatët pretendentë, të cilët në asnjë rast nuk duhet të ndërhyjnë gjatë procesit. Për çdo kontestim apo vërejtje lidhur me procesin e votimit apo numërimit, që ato mund të kenë duhet t'i drejtohen me shkrim Aparatit Qendror pranë Këshillit Kombëtar. Në rast të mos paraqitjes së kontestimit anëtarët e pranishëm duhet të nënshkruajnë marrjen dijeni të rezultatit dhe pranimin e tij.

Aparatit Qendror Ekzekutiv pranë Këshillit Kombëtar, lidhur me kontestimin e paraqitur nga kandidati, trajton problematikën e paraqitur dhe vendos rast pas rasti.

Pas përfundimit të votimit nga ana e anëtarëve të asamblesë rajonale lidhur me zgjedhjen e anëtarëve të Këshillit rajonal përkatës, Komisioni i Administrimit të Zgjedhjeve shënon në proces verbal mbylljen e votimit dhe fillon procesin e numërimit të fletëve të votimit.

Në këtë proces mund të jenë të pranishëm kandidatët për anëtarë të këshillit rajonal përkatës në rast se ata ri kandidojnë, por nuk kanë asnjë të drejtë të bëjnë asnjë ndërhyrje.

Kopje e këtij proces verbali i dorëzohet Këshillit Rajonal përkatës, i cili merr masat për komunikimin e rezultatit dhe të njoftimit e anëtarëve të asamblesë rajonale përkatëse lidhur me votimin për zgjedhjen e anëtarëve të Këshillit Rajonal përkatës.

Neni 11

Zgjedhja e Presidentit të Këshillit Rajonal.

Pas nxjerrjes së rezultatit, anëtarët e sapozgjedhur të këshillit rajonal, zhvillojnë mbledhjen e parë të këtij këshilli.

Mbledhja e parë të këshillit rajonal të sapozgjedhur nuk duhet të jetë më shumë se 5 ditë nga shpallja e rezultatit përfundimtar.

Në mbledhjen e parë të këshillit rajonal bëhet edhe përzgjedhja e presidentit të këshillit rajonal, që do të jetë njëri nga 5 (pesë) anëtarët e sapo emëruar, i cili do të përzgjidhet me shumicën e thjeshtë të votave.

Mbledhja mbahet nga sekretari ekzistues, ku janë të pranishëm 2 anëtarët e Komisionit të Administrimit të Zgjedhjeve.

Vendimi për zgjedhjen e Presidentit nga Këshilli Rajonal përkatës i komunikohet menjëherë Këshillit Kombëtar.

Neni 12

Zgjedhja e anëtarëve të Këshillit Kombëtar

Pas përfundimit të zgjedhjeve të anëtarësisë së këshillave rajonale, si dhe zgjedhjes së Presidentëve të këshillave rajonale, Presidenti ekzistues i Këshillit Kombëtar të Urdhrit të Mjekëve të Shqipërisë, në datën e caktuar thërret asamblenë kombëtare. Aparati Qendror

pranë Këshillit Kombëtar ngarkohet për marrjen e masave për komunikimin e njoftimeve si dhe të masave për zhvillimin e asamblesë kombëtare.

Anëtarët e Asamblesë kombëtare kanë detyrimin për të marrë të gjitha masat që të jenë të pranishëm në asamblenë kombëtare.

Në zbatim të nenit 13 të ligjit Nr. 123/2014 “Për urdhrin e mjekëve në Republikën e Shqipërisë” si dhe të nenit 17 “Statuti i Urdhrit të Mjekëve të Shqipërisë” zgjidhen 20 anëtarët e Këshillit Kombëtar.

Votimi për zgjedhjen e anëtarëve në Këshillin Kombëtar të Urdhrit të Mjekëve të Shqipërisë bëhet i hapur, me përjashtim të rastit kur asamblea kombëtare vendos ndryshe.

Duke qënë se presidentët e këshillave rajonale janë përzgjedhur nga asambletë rajonale, si dhe duke pasur parasysh rolin e tyre dhe përfaqësimin e rajonëve përkatëse pranë Këshillit Kombëtar të Urdhrit të Mjekëve të Shqipërisë, 12 presidentët votohen në bllok si anëtarë të këshillit kombëtar.

Kandidaturat e paraqitura për anëtarë të Këshillit Kombëtar konkurojnë për vendet e ngelura dhe zgjidhen me votim të hapur, me përjashtim të rasteve kur vetë Asamblea voton ndryshe.

Kandidaturat, votohen nga asamblea kombëtare, dhe fitojnë kandidaturat që kanë marrë numrin më të madh të votave.

Data për zhvillimin e mbledhjes së Këshillit Kombëtar të sapo zgjedhur caktohet nga Presidenti ekzistues i Këshillit kombëtar, në të cilën do të bëhet edhe zgjedhja e presidentit të ri.

Votimi për zgjedhjen e Presidentit të Këshillit Kombëtar bëhet votim i mbyllur.

Komisioni i Administrimit të Zgjedhjeve merr të gjitha masat për organizimin e zgjedhjes së Presidentit të Këshillit Kombëtar të Urdhrit të Mjekëve të Shqipërisë.

Neni 13

Ankimimet dhe kontestimet në Aparatin Qendror Ekzekutiv

Çdo kandidat që ka ndonjë ankesë për zhvillimin e procesit të votimit apo kontestim lidhur me rezultatin, duhet ta paraqesë me shkrim brenda 5 ditëve nga zhvillimi i procesit apo nga nxjerrja e rezultatit.

Aparati Qendror Ekzekutiv pas marrjes së ankesës apo të kontestimit të paraqitur nga kandidati, menjëherë merr në shqyrtim rastin duke bërë verifikimin e proces verbaleve të mbajtura nga Komisioni i Administrimit të Zgjedhjeve si dhe kur konstaton së ka pasur shkelje të tilla që mund të kenë ndikuar në rezultatin e zgjedhjeve mund të vendosë përsëritjen e zgjedhjeve për atë rajon.

Në rast të kontestimit të rezultatit të votimit, Aparati Qendror Ekzekutiv mund të marrë vendim që në prani të Komisioni i Administrimit të Zgjedhjeve dhe të kandidatit që ka paraqitur kontestimi të bëj rinumërimin e fletëve të votimit.

Në rast kur nga rinumërimi i fletëve të votimi konstatohen ndryshime që ndikojnë në rezultatit përfundimtar, Aparati Qendror Ekzekutiv merr vendim duke shpallur rezultatit përfundimtar të votimit duke ndryshuar rezultatit e nxjerrë nga Komisioni i Administrimit të Zgjedhjeve.

Neni 14

Dispozita të përgjithshme

Ky udhëzim u vihet në dijeni të gjithë Këshillave Rajonale që në bashkëpunim me Këshillin Kombëtar të Urdhrit të Mjekëve të Shqipërisë dhe me strukturat e saj të merren me mirë organizimin e zgjedhjeve.

Ky udhëzim të bëhet publik për informimin e anëtarësisë lidhur me procedurat e kandidimit, votimit, numërimit, dhe nxjerrjes së rezultateve përfundimtare të këtyre zgjedhjeve.

Miraturar me vendimin Nr. 6, datë 21.11.2024 të Këshillit Kombëtar të UMSH-së

President

Dr. Fatmir Brahimaj